

ব্রি ও বারি পরিদর্শনে নেপালের পার্লামেন্ট প্রতিনিধিদল

প্রতিনিধি, গাজীপুর

নেপাল পার্লামেন্টের একটি প্রতিনিধিদল বাংলাদেশ কৃষি গবেষণা ইনস্টিটিউট (বারি) ও ধান গবেষণা ইনস্টিটিউট (ব্রি) পরিদর্শন করেছেন। দলটির নেতৃত্বে ছিলেন নেপাল পার্লামেন্টের সংসদ কমিটির কৃষিবিষয়ক প্রধান এবং নেপালের সাবেক ফাস্টলেডি আরজু রানা দেউবা।

গতকাল বৃহস্পতিবার প্রতিনিধিদলটি বারি সদর দপ্তরে এসে পৌঁছালে তাঁদের স্বাগত জানান ইনস্টিটিউটের বিজ্ঞানী ও কর্মকর্তারা। পরে বারি মহাপরিচালকের সভাকক্ষে অনুষ্ঠিত সংক্ষিপ্ত মতবিনিময় অনুষ্ঠানে স্বাগত দেন রাখেন ইনস্টিটিউটের মহাপরিচালক দেবশীষ সরকার। এরপর মাল্টিমিডিয়া প্রদর্শনের মাধ্যমে ইনস্টিটিউটের বিভিন্ন কার্যক্রম, অগ্রগতি ও সাফল্য তুলে ধরেন বারির পরিচালক (পরিকল্পনা ও মূল্যায়ন) দিলোয়ার আহমদ চৌধুরী। অতিথিরা বারির পেস্টিসাইড অ্যানালাইটিক্যাল ল্যাবরেটরি, প্ল্যান্ট ডিজিস ডায়াগনস্টিক ল্যাবরেটরি পরিদর্শন করেন এবং ইনস্টিটিউটের বর্তমান কার্যক্রম, অগ্রগতি ও সাফল্য দেখে সন্তোষ প্রকাশ করেন।

একই দিন প্রতিনিধিদলটি বাংলাদেশ ধান গবেষণা ইনস্টিটিউটের (ব্রি) সদর দপ্তর পরিদর্শন করেন। দলটি ব্রির মহাপরিচালক শাহজাহান কবীরের সঙ্গে সাক্ষাৎ করেন। পরে দলটি ব্রির জ্যেষ্ঠ বিজ্ঞানীদের সঙ্গে এক মতবিনিময় সভায় মিলিত হন। এ ছাড়া তাঁরা ব্রির সেন্ট্রাল ল্যাব, জিন ব্যাংক, রাইস মিউজিয়াম এবং গবেষণা মাঠ পরিদর্শন করেন।

ব্রির প্রশিক্ষণ ভবনের সভাকক্ষে অনুষ্ঠিত মতবিনিময় সভায় সভাপতিত্ব করেন ব্রির মহাপরিচালক শাহজাহান কবীর। সভার শুরুতেই তিনি ব্রির অর্জন ও অগ্রগতি সম্পর্কিত তথ্যাদি উপস্থাপন করেন। সভায় আরজু রানা দেউবা ব্রির অর্জন ও অগ্রগতির ভূয়সী প্রশংসা করেন এবং কৃষি উন্নয়নে পারস্পরিক সহযোগিতার ওপর গুরুত্বারোপ করেন।